



Sud Bosne i Hercegovine
Суд Босне и Херцеговине

Broj: S1 3 Iž 043462 22 Iž
Sarajevo, 11.08.2022. godine

Sud Bosne i Hercegovine, u vijeću Apelacionog odjeljenja sastavljenom od sudija Zvezdane Antonović, kao predsjednika vijeća, Dinke Bešlagić-Čovrk i Mirka Božovića, kao članova vijeća, odlučujući o žalbi Indire Selimović, iz S., ..., izjavljenoj protiv Odluke Centralne izborne komisije Bosne i Hercegovine broj: 06-1-07-1-608-3/22 od 04.08.2022. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine, u nejavnoj sjednici, održanoj dana 11.08.2022. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine po podnesenim prijavama do 19.07.2022. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što uz prijavu nije dostavljen dokaz o tačnoj adresi u inostranstvu.

Žaliteljica je protiv navedene odluke blagovremeno izjavila žalbu u kojoj navodi da je kao dokaz boravišta priložila račun za struju i račun za osiguranje auta, te da ti dokumenti predstavljaju dovoljan dokaz o adresi boravišta.

Centralna izborna komisija Bosne i Hercegovine u odgovoru na žalbu predlaže da se žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave za glasanje izvan BiH dostavljene dana 06.07.2022. godine, u skladu sa Uputstvom o postupku slanja, prijema, arhiviranja i zaštite elektronskih prijava državljana Bosne i

Hercegovine za glasanje izvan BiH elektronskim putem („Službeni glasnik BiH“ broj, 27/22), pravilno uočila da podnositelj prijave priložila račun za struju, i za osiguranje auta sa adresom boravišta u inostranstvu, što se ne osporava ni žalbom, a što se ne može uzeti kao validan dokumenat u skladu sa odredbom člana 10 Uputstva o postupku slanja, prijema, obrade, arhiviranja i zaštite elektronskih prijava i dokumenata državljana BiH za glasanje izvan BiH elektronskim putem.

Postupajući na način opisan u prednje utvrđenom činjeničnom stanju, podnositelj žalbe je postupio suprotno odredbi člana 3.15 stav (2) Izbornog zakona BiH („Službeni glasnik BiH“, broj 23/01 do 51/22), kojom je propisano da državljanin BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

U konkretnom slučaju žaliteljica uz prijavu nije dostavila sve potrebne i propisane podatke, obzirom da nije dostavio validan dokaz o tačnoj adresi u inostranstvu od nadležnog organa ili važeći lični dokument izdat od zemlje domaćina koji sadrži tačnu adresu boravišta u inostranstvu, odnosno dokaz koji bi potvrdio da su ispunjeni uslovi da se u smislu člana 3.15 stav 6. Izbornog zakona BiH nađe na izvodu iz Centralnog biračkog spiska za glasanje van BiH.

Takođe, nakon obrade prijave žaliteljica je putem e-maila obaviještena da njena prijava za glasanje izvan BiH sadrži nedostatke. Nevedene nedostatke žaliteljica nije otklonila u predviđenom roku, nego tek uz žalbu navodi svoju adresu boravišta izvan BiH.

Napomene radi, žalitelju nije oduzeto biračko pravo za Opće izbore 2022. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A**

Zvezdana Antonović